

Prome Ministro ta expresa sosten na Glenbert:

"Un trampa a worde pone pa e Ministro"

GRANJESTAD (AAN): En coneccion cu e sentencia den e caso hudicial di Parlamento sr. Glenbert Croes di Partido Ola, Prome Minister sr. Henny Eman ta duna di conoce den un declaracion oficial cu ningun momento e

caso hudicial aki ta afecta e Coalicion di AVP/OLA den gobierno.

Eman ta bisa cu locual a sosode cu sr. Glenbert Croes, lo por pasa cu cualke lider hoben cu na cierto momento ta pone y de facto mester por

pone tur confiansa den su conseheronan. Lamentablemente e ultimonan aki a pone un trampa pa e Minister. Ningun momento tabata tin indicacion di mala fe di parti di sr. Glenbert Croes, asina Prome Minister ta declara.

Pero, segun Henny Eman loke a pasa cu Glenbert Croes ta algo cu ta pasa un biaha so den bida di un mandatario. Un biaha so lo por pasa cu un Minister ta bay completamente tras di su conseheronan sin mas pa e haye den un mal trampa asina. Prome Minister Henny Eman a expresa su mes na un manera hopi cla bisando cu sr. Glenbert Croes por sigui conta cu sosten di su partido AVP den gobierno y cu e ta spera cu ohala e caso aki tuma un direccion mas positivo pa sr. Glenbert Croes. Mas aleu Prome Minister ta sigui splica cu loke e caso lamentabel aki ta demostra un biaha mas ta e hecho cu ta di suma importancia pa un Minister tin hendenan di confiansa cerca di su persona riba cual e por conta incondicionalmente.

E caso aki un biaha mas ta un indicacion palpabel di e peligro cu cada mandatario ta core ora tin hendenan cerca di nan den gobierno cu no ta hendenan yegá na su partido

of na su gobierno. Pa colmo den e caso aki sr. Glenbert Croes a deposita su confiansa riba hendenan cerca di su persona y asina mes nan a traicion'e. Corda ora bo tin di haber cu hendenan cu no ta di bo banda mes of cu no ta hendenan responsabel. Esaki ta algo sumamente peligroso cu sa pasa ora bin cambio den gobernacion, asina Prome Minister a duna di conoce. Prome Minister ta splica cu e hecho aki ta algo cu su Gobierno ta bay tene bon cuenta cu ne den introduccion di Rapport Calidad. Puntanan manera esaki ta haya hopi atencion y lo bay asina leu pa introduci sistemanan pa pone conseheronan di ministernan, hefenan di departamentonan tambe responsabel pa nan accionnan.

Un Minister mester por confia cien por ciento riba su conseheronan politico. Te asina leu un declaracion di Prome Minister Henny Eman encuanto e sentencia di sr. Glenbert Croes.

Segun Gobierno:

IMF ta impresiona cu transparencia di maneho di Minister di Finanzas

GRANJESTAD (AAN): Un comunicado di Gobierno, ta indica cu durante reunionnan cu IMF a hiba cu e team di Directie Financiën e miembronan di e delegacion a duna di conoce cu nan ta sumamente contento cu e transparencia di maneho di Minister di Finanzas Tico Croes. Compara cu un par di aña pasa e transparencia ta hopi mas grandi. Diamars ultimo e delegacion a reuni cu Minister Tico Croes na unda maneho financiero a worde discuti den detaye.

Despues di un bishita di orientacion siman pasa, na unda un documento cu contesta riba diferente pregunta di parti IMF a worde entrega, diahuebs y diabierna a reuni cu Directie Financiën na unda e delegacion tabatin oportunidad pa haci pregunta mas specifico. Resultado di e reunionnan tabata masha positivo y delegacion di IMF a gradici e team di Directie Financiën pa e bon preparacion y pa e transparencia.

Transparencia: Transparencia di maneho di Gobierno ta stipula den Rapport Calidad y ta parti di Bon Gobernacion. Den cuadro di esey Minister di Finanzas Tico Croes ta publica mensualmente cifras di entre otro entrada di impuesto. Durante e reunionnan cu delegacion di IMF a hiba cu Directie Financiën y tambe Minister di Finanzas Tico Croes a entrega cifras mas recien cu tin di ha-

ber cu finanzas publico. Na tur ta definitivo ainda, pasobra algun cifras riba transacciebasis mester warda riba jaarrekening di '98 y '97, pero nan ta cifras cu Directie Financiën ta para nan tras cien por ciento.

Raport definitivo: Pa finalisa e bishita na Aruba, cu desde Status Aparte ta worde hiba cada dos aña, e delegacion di IMF lo hiba su ultimo reunion cu Consejo di

Minister diamars awor. Durante e reunion aki delegacion di IMF lo discuti su evaluacion preliminar cu Consejo di Minister. Pa fin di April e delegacion lo tin su rapport definitivo cla pa entrega na Board of Directors di IMF (Fondo Monetario Internacional). Pa medio di luna di Mei lo manda e rapport definitivo pa e departamento y instancianan concerni aki na Aruba.

KI DIA OLA LO SALI FOI COMA!!



TELEFONNAN
DI DIARIO
826747
FAX
828551